

**NIJAZ MUSIĆ
ALJOŠA ČAMPARA
Delegati u Domu naroda
Parlamenta Federacije Bosne i Hercegovine**

Sarajevo, 15.3.2022. godine

**PARLAMENT FEDERACIJE
BOSNE I HERCEGOVINE
DOM NARODA
n/r gđin Tomislav Martinović, predsjedavajući**

**PREDMET: PRIJEDLOG ZAKONA O DOPUNI ZAKONA O POREZU NA
DOHODAK - skraćeni postupak - dostavlja se,**

Na osnovu člana 164. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03, 21/09 i 24/20), kao ovlašteni predlagači, podnosimo, radi razmatranja i donošenja po skraćenom postupku, **PRIJEDLOG ZAKONA O DOPUNI ZAKONA O POREZU NA DOHODAK .**

Delegati:

**NIJAZ MUSIĆ
ALJOŠA ČAMPARA**

PRIJEDLOG

ZAKON
O DOPUNI ZAKONA O POREZU NA DOHODAK

Sarajevo, mart 2022. godine

RAZLOZI ZA DONOŠENJE ZAKONA PO SKRAĆENOM POSTUPKU

U skladu sa članom 164. stav 1. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09 i 24/20) , predlaže se donošenje Zakona o dopuni Zakona o porezu na dohodak po skraćenom postupku , obzirom da nije u pitanju složen i obiman zakon.

ZAKON

O DOPUNI ZAKONA O POREZU NA DOHODAK

Član 1.

U Zakonu o porezu na dohodak ("Službene novine Federacije BiH", br. 10/08, 9/10, 44/11, 7/13 i 65/13), u članu 5. u stavu 1. dodaje se tačka 13) koja glasi:

“13) sve subvencije, premije i druga sredstva koja se u svrhu poticanja razvoja poljoprivrede, plaćaju, odnosno isplaćuju iz budžeta Federacije, kantona i jedinica lokalnih samouprava na poseban namjenski račun nosiocu porodičnog poljoprivrednog gazdinstva koji je upisan u registar poljoprivrednih gazdinstava u skladu sa propisima koji uređuju tu oblast.”

Član 2.

Ovaj zakon stupa na snagu narednog dana od dana objavljivanja u „Službenim novinama Federacije BiH“.

OBRAZLOŽENJE

ZAKONA O DOPUNI ZAKONA O POREZU NA DOHODAK

I- USTAVNI OSNOV

Ustavni osnov za donošenje Zakona o dopuni Zakona o porezu na dohodak je u članu III 1. b) i c) Ustava Federacije Bosne i Hercegovine („Službene novine Federacije BiH“, broj: 1/94), prema kome je u isključivoj nadležnosti Federacije utvrđivanje ekonomske politike, uključujući planiranje i obnovu, te politiku korišćenja zemljišta na federalnom nivou, te donošenje propisa o finansijama i finansijskim institucijama Federacije i fiskalna politika Federacije.

II- RAZLOZI ZA DONOŠENJE ZAKONA

Razlog donošenja Zakona o dopuni Zakona o porezu na dohodak je u poboljšanju sveukupnog zakonskog okvira i olakšavanja poslovanja u poljoprivrednoj djelatnosti na način da se navedenim izmjenama i dopunama poljoprivredni proizvođači koji se nalaze u veoma teškoj situaciji rasterete na način da nisu obavezni na poticajna sredstva koja im se daju sa nivoa odnosno iz budžeta Federacije, kantona i jedinica lokalnih samouprava plaćati porez na dohodak, čime se dovode u jedan veoma nepovoljan položaj.

U cilju poboljšanja statusa cjelokupne poljoprivrede i statusa poljoprivrednih proizvođača u cjelini, a koji su se našli u veoma nezavidnom položaju uslijed poremećaja nastalih na globalnom svjetskom tržištu uzrokovanim trenutnom teškom i krajnje uslošnjenom situacijom nastalom trenutnim ratnim dešavanjima kao i posljedicama koja ta dešavanja reflektiraju na sve segmente života uključujući tu i poljoprivredu kao jednu od strateških grana na kojoj bi trebalo da se bazira razvoj BiH kao i same FBiH, potrebno je da se hitno interveniše i izvrše dopune Zakona o porezu na dohodak ("Službene novine Federacije BiH", br. 10/08, 9/10, 44/11, 7/13 i 65/13). S tim u vezi, potrebno je izvršiti dopune člana 5. stav 1. u kome je potrebno dodati novu tačku 13) koja glasi "sve subvencije, premije i druga sredstva koja se u svrhu poticanja razvoja poljoprivrede, plaćaju, odnosno isplaćuju iz budžeta Federacije, kantona i jedinica lokalnih samouprava na poseban namjenski račun nosiocu porodičnog poljoprivrednog gazdinstva koji je upisan u registar poljoprivrednih gazdinstava u skladu sa propisima koji uređuju tu oblast.

Naime, svjedoci smo da nakon što je Rusija izvršila invaziju na Ukrajinu, cijene ključnih poljoprivrednih proizvoda iz tih zemalja naglo su porasle, dok stručnjaci upozoravaju da se svijet približava krizi s hranom koja bi mogla uticati na milione ljudi. Sama Ukrajina i Rusija su veoma poznate po veoma velikoj poljoprivrednoj proizvodnji prije svega pšenice, kukuruza, suncokretovog ulja i drugih proizvoda tako da oko jedne četvrtine svjetskog izvoza pomenutih proizvoda otpada na ove zemlje.

Cijene na robnim tržištima rastu – cijena pšenica je porasla za oko 50 odsto za dvije sedmice, a kukuruz je dostigao najviši nivo u deceniji. Analitičari predviđaju da će izvozni tokovi i dalje biti poremećeni mjesecima čak i ako se rat završi sutra. Nesigurnost vezana za hranu se udvostručila u posljednje dvije godine.

Takođe je u ovom periodu, itekako se to da vidjeti, zabilježen nagli skok cijena hrane kakav nije zabilježen od recesije 2008 godine. Pored gore navedenih problema, evidentno je da se u posljednje vrijeme pojavljuje sve veći broj zemalja uključujući i neke naše susjede sa nepopularnom mjerom zabrane izvoza određenih poljoprivrednih proizvoda što itekako može dodatno usložniti i pogoršati situaciju na tržištu hrane.

U novom izvještaju Organizacije za hranu i poljoprivredu Ujedinjenih nacija (FAO), objavljenom 11. marta, procjenjuje se da bi cijene hrane i stočne hrane mogle porasti za sedam do 22 odsto iznad već povišenih cijena zbog rata.

U takvim okolnostima neophodno je da se od strane države poduzmu hitne i veoma radikalne mjere u cilju što veće pomoći poljoprivredi i poljoprivrednim proizvođačima koji su trenutno u veoma nezavidnom položaju i većina njih nažalost mora razmišljati i razmišlja o prestanku bavljenja ovom vrstom djelatnosti.

Naime, prošlogodišnja suša a sad nažalost i ova dešavanja dovela su poljoprivrednike pred slom, jer u situaciji u kakvoj se trenutno nalaze veoma teško mogu opstati a kamo li naći neku ekonomsku korist ili dobit koja bi ih održala u bavljenju ovom vrstom djelatnosti.

Zbog svega gore navedenog, neophodno je poduzeti mnogo koraka kako bi pokušali spasiti ono što se može spasiti i kako bi našim poljoprivrednim proizvođačima omogućili opstanak u bavljenju poljoprivrednom djelatnošću, a našem stanovništvu osigurali koliko toliko sigurnu proizvodnju hrane na našim domaćim prostorima.

III- OBRAZLOŽENJE POJEDINIH ODREDBI

Članom 1. propisano je da se u Zakonu o porezu na dohodak kao prihodi ne računaju sve subvencije, premije i druga sredstva koja se u svrhu poticanja razvoja poljoprivrede, plaćaju, odnosno isplaćuju iz budžeta Federacije, kantona i jedinica lokalnih samouprava na poseban namjenski račun nosiocu porodičnog poljoprivrednog gazdinstva koji je upisan u registar poljoprivrednih gazdinstava u skladu sa propisima koji uređuju tu oblast.

Članom 2. propisano je stupanje na snagu zakona.

IV- FINANSIJSKA SREDSTVA

Za provođenje predložene dopune Zakona o porezu na dohodak nisu potrebna dodatna finansijska sredstva.